

廣名將傳
二



廣 名 將 傳

(二)

黃道周註斷

廣名將傳卷五

虞詡

虞詡字升卿。陳國武平人也。初辟太尉李修府。永初中。羌胡反亂。新破并涼。大將軍鄧騭以軍役方費。事不相贍。欲棄涼州。並力北邊。乃會公卿集議。騭曰。譬若衣敗壞。一以相補。猶有所完。否則兩無所得。議者是之。詡聞之。乃說李修曰。涼州先帝開拓土宇。劬勞後定。今憚小費。便欲舉而棄之。涼州既棄。卽以三輔爲塞。三輔爲塞。則園陵單外。此不可之甚者也。諺曰。關西出將。觀其習兵壯勇。實過餘州。今羌人不敢入據三輔。爲腹心之害者。以涼州在後故也。其土人所以摧鋒執銳。無反顧之心者。爲臣屬于漢故也。若棄其境域。徙其人庶。安土重遷。必生異志。如使豪傑相聚。席卷而東。雖賁育爲卒。太公爲將。猶恐不足當禦。議者乃喻補衣猶有所完。詡恐其疽食侵淫。而無限極。疽食謂疽潰爛而四食其傍也。棄之非計。修曰。吾意不及此。微子言。幾誤國事。然則計將安出。詡曰。今涼土騷動。人情不安。恐有非常之變。宜令四府九卿。各辟彼州數人。其守牧令長子弟。皆除爲冗官。外以勸勵。答其功勤。內以拘致。防其邪計。修善其言。更集四府。皆從詡議。於是辟西州豪傑爲掾屬。拜牧守長吏子弟爲郎。以安慰之。而涼州無恙。鄧騭以詡異己。欲以吏法中傷之。會朝歌賊甯季等數千人。攻殺長吏。屯聚連年。州郡不能制。因以詡爲朝歌長。故舊弔之。詡曰。不遇盤根錯節。無以別利器。始到。謁河內太守馬稜曰。朝歌者韓魏之郊。背太行。臨黃河。去敖倉百里。而青冀之

流亡萬數。賊不知開倉招衆。劫庫兵。守成臯。斷天下右臂。吾知其無能爲也。今其衆新盛。難與爭鋒。兵不厭權。願寬假轡策。勿令有所拘閔而已。及到官。設三科以募求壯士。其攻劫者爲上。傷人偷盜者次之。帶裘服而不事家業者爲下。收得百餘人。詡爲饗會。悉貫其罪。使入賊中。誘令劫掠。乃伏兵以待之。遂殺賊數百人。又潛遣貧人能縫者。傭作賊衣。以綵線縫其裾爲識。有出市里。吏輒擒之。賊由是駭散。咸稱神明。後羌寇武都。鄧太后以詡有將帥之略。遷武都太守。羌乃率衆數千。遮詡於陳倉嶠谷。詡卽停軍不進。而宣言上書請兵。須到當發。羌聞之。乃分鈔旁縣。詡因其兵散。遂日夜進道兼行百餘里。令吏士各作兩竈。日增倍之。羌不敢逼。或問曰。孫臏減竈而君增之。兵法日行不過三十里。今日且二百里。何也。詡曰。敵衆多。吾兵少。徐行則爲所及。速進則彼所不測。敵見吾竈日增。必謂郡兵來迎。衆多行速。必憚追我。孫臏見弱。吾今示強。勢有不同耳。旣到郡。兵不滿三千。而羌衆萬餘。攻圍赤亭。戰之日。詡乃令軍中強弩勿發。而潛發小弩。羌以爲矢力弱。不能至。并兵急攻。詡於是使二十彊弩共射一人。發無不中。羌大震退。詡因出城奮擊。多所殺傷。明日。悉陳其兵衆。令從東郭門出。北郭門入。改易衣服。回轉數周。羌不知其數。更相恐動。詡計賊當退。乃潛遣五百餘人於淺水設伏。候其奔躍。敵果大奔。因掩擊大破之。軍威甚盛。賊由是散敗。南入益州。詡乃占相地勢。築營壁共八十所。招還流亡。假貸貧人。郡遂以安。先是。運道隘險。舟車不通。驢馬負載。僦五致一。詡乃自將吏士。按行川谷。自沮至下辨。數十里中。皆燒石翦木。開漕運道。以人僦直。顧借傭者。於是水運通利。歲省四千餘萬。永和初。遷尙書令。卒。臨終。謂子恭曰。吾事君直道。行已無愧。所

悔者爲朝歌長時殺賊數百人不能無冤者自此二十餘年家門不增口獲罪于天也。

斷曰

涼州之地三輔障礙園陵賴安如何可棄譬之完衣是惜小費卿辟數人方爲大計賊橫朝歌州郡莫制鄧欲中傷以詡爲吏誰知盤錯正別利器募罪誘誅縫綵擒市羌寇武都增竈速至陳兵顯威強弩示利淺水破之郡民安濟直道事君死而無愧家口不增殺冤獲罪。

皇甫規

皇甫規字威明安定朝歌人也。永和中西羌大寇三輔圍安定征西將軍馬賢率郡兵擊之規時雖在布衣見賢不恤軍士料其必敗因上書言狀已而果敗郡將知規有兵略命爲功曹使率甲士八百與羌戰勝之賊遂退卻後羌衆大合攻燒隴西規乃上疏乞自劾曰羌戎潰叛皆因邊將失于綏御乘常守要則加侵暴苟競小利則致大害微勝則虛張首級軍敗則隱匿不言軍士勞怨困于猾吏進不得決戰以邀功退不得溫飽以全命徒見王師之出不聞振旅之聲曾豪泣血驚懼生變安不能久敗則經年此臣所以搏手叩心而增歎者也。願假臣二郡屯列坐食之兵五千出其不意與護羌校尉趙冲共相首尾土地山谷臣所曉習兵勢巧便臣所更歷可不煩方寸之印尺帛之賜而高可滌患下可納降桓帝不能用時泰山賊叔孫無忌侵亂郡縣中郎將宗資討之未服特召規拜泰山太守規到官廣設方略寇賊悉平延熹中西羌寇掠關中規素習羌事志在奮効復上疏願乞冗官以備單車之使勞來三輔宣囑威澤以所

習地形兵勢。佐助諸軍。至冬。羌遂大合。朝廷爲憂。乃命規爲中郎將。持節監關西兵。討零吾等。破之。斬首八百級。先零諸種羌慕規威信。相勸降者十餘萬。先是安定太守孫雋。屬國都尉李翁。並張稟郭閎趙熹等。並不堪任職。而皆倚恃權貴。不遵法度。規到川界。悉條奏其罪。或免或誅。羌人聞之。翕然反善。至營數月。上書薦中郎將張奐以自代。曰。兵無強弱。而將有能否。張奐才略兼優。宜正元帥。以從衆望。若謂臣宜充軍事。願爲奐副。詔從之。熹平三年。以疾召還。未至卒。

斷曰

西羌寇邊。馬賢爲帥。規尙布衣。早知其敗。用爲功曹。羌始少懈。兵弊萬端。上書陳概。朝耳漠然。不知倚賴。賊侵泰山。急纔召拜。方略少施。卽平賊害。再命。中郎。零吾破壞。諸羌慕威。率降滿塞。奏罷不堪。一時稱快。抱疾欲還。薦賢自代。召歸雖亡功名自在。

張奐

張奐字然明。燉煌酒泉人也。舉賢良。擢拜安定屬國都尉。初到職。而南單于左奠鞬等七千餘人寇美稷。東羌復欲舉種應之。而奐壁惟二百許人。聞報。卽勒兵而出。軍吏以力不敵。叩頭爭止。奐不聽。遂進屯長城。收集兵士。遣將王衛招誘東羌。因據要地。使南單于不得交通。東羌諸豪遂相率與奐和親。共擊左奠鞬等。連戰破之。羌豪帥感奐恩德。上馬二十四匹。先零酋長又遣金鑠八板。奐召主簿於諸羌前。以酒酹地。曰。使馬如羊。不以入廐。使金如粟。不以入懷。悉以金馬還之。羌性貪而貴吏清。前都尉率好財貨。爲所患。

苦及奐正身潔已威化盛行遷爲護遼中郎將時屠各及朔方烏桓並同反叛燒度遼將軍皇甫規門引屯赤陁烟火相望兵衆大恐各欲亡去奐坐帷中與弟子講誦自若軍士稍安乃潛誘烏桓陰與通和遂使斬屠各渠帥襲破其衆諸羌悉降延熹元年鮮卑寇邊奐率南單于擊之斬首數百級幽并清靜九年春召拜大司農鮮卑聞奐去遂招結南單于烏桓數道入塞寇掠緣邊九郡朝廷以爲憂復拜張奐爲護遼中郎將單于烏桓聞奐至因相率還降凡二十萬口奐但誅其首惡餘俱慰納之司隸校尉王寓出于宦者欲借寵公卿以求薦舉百僚畏憚莫不許諾惟奐獨拒之寓怒遂陷以黨罪禁錮歸田里奐少有志節嘗言士大夫處世當爲國家立功邊境及爲將帥果有勳名董卓慕之使其兄遺縑百匹奐惡卓爲人絕而不受光和四年卒年七十有八

斷曰

張奐賢良拜邊郡尉羌騎七千一時寇卒又聞東羌復欲與會奐兵百餘急出結隊吏士懼爭奐了不畏據地阻之使謀不遂誘羌和親敵人早潰羌帥感恩金馬交饋如粟如羊不令心愧既遷中郎烏屠反背知其無能安坐講誨縱叛終降降則恩慰濁宦惡清陷以黨罪禁錮歸田尙辭奸賄名將如斯所以足貴

段熲

段熲字紀明武威姑臧人也少便習弓馬尙游俠輕財賄長乃折節好古學初舉孝廉遷遼東屬國都尉

時鮮卑犯塞。頽卽率所領馳赴之。旣而恐賊驚去。乃使驛騎詐齎璽書召頽。頽於道僞退。潛於還路設伏。敵信之。乃入追頽。頽因大縱兵。悉斬獲之。延熹二年。遷護羌校尉。四年冬。隴西牢姐烏音諸種兵共寇并涼二州。頽將湟中義從羌討之。涼州刺史郭閎貪其功。稽留頽軍。使不得進。義從役久。戀鄉舊。皆悉反叛。郭閎歸罪于頽。頽坐下詔獄。輸作左校。羌遂陸梁。覆沒營塢。轉相招結。唐突諸郡。於是吏人守關訟頽以千數。朝廷知頽爲郭閎所誣。詔問其狀。頽但謝罪。不敢言枉。京師稱爲長者。復拜議郎。遷并州刺史。進軍擊當煎種于湟中。頽兵敗。被圍二日。用隱士樊志張策。潛師夜出。鳴鼓還戰。大破之。斬獲甚衆。遂窮追展轉山谷間。自春及秋。無日不戰。敵遂饑困敗散。除斬獲降者萬餘落。遂封頽爲都鄉侯。西羌弭定。東羌先零等自覆沒馬賢後。數寇三輔。降叛不一。桓帝問頽曰。東羌先零等造惡反逆。而皇甫規張奐各擁強衆。不能輯定。欲移兵東討。未識其宜。可三思方略。頽曰。先零東羌。狼子野心。難以恩納。勢窮雖服。兵去復動。惟當長矛挾脇。白刃加頸耳。自雲中五原。西至漢陽。二千餘里。比之種羌並擅其地。是爲擁疽伏疾。留滯脇下。如不加誅。轉就滋大。今若以騎五千。步萬人。車三千兩。三冬二夏。足以破定。如此則羣寇破盡。胡人長服。帝許之。頽遂將兵萬餘人。齎十五日糧。從彭陽直指高平。與先零諸種戰於逢義山。羌兵盛。頽衆恐。頽乃令軍中張鍬利刃。長矛三重。挾以強弩。列輕騎爲左右翼。又激怒兵將曰。今去家數千里。進則事成。走則必死。須努力共功名。因大呼。衆皆應聲騰赴。頽馳騎于傍夾擊之。羌衆大潰。斬獲甚衆。時張奐上言。東羌雖破。餘種難盡。宜以恩降。可無後悔。詔書下頽。頽復上言。昔先零作寇。趙充國徙令居內。煎當亂邊。

馬援遷之三輔。始服終叛。至今爲梗。今傍近戶口數爲創毒。而欲令降徙與之雜居。是猶種枳棘于良田。養蛇蝎于內室也。臣每奉詔書。軍不內御。願卒斯言。不失權便。因遣田晏。夏育進據凡亭山上。羌恐來攻。晏等殊死戰。大破之。羌奔聚射虎谷。分兵守諸谷。上下門。頽遣人結木爲柵。廣二十步。長四十里。遮之分。遣晏育等將兵。啣枚夜上西山。結營穿塹。又遣張愷等將兵上東山。羌乃覺之。遂攻晏等。分遮汲水道。頽自率步騎進擊。水上羌卻走。因與愷等挾東西山。兵縱擊破之。羌復敗散。深山窮谷。處處皆盡。斬渠帥以下萬九千級。獲牛馬驢騾氈裘廬帳什物不可勝數。招降四千人。分置安定。漢陽。隴西三郡。東羌悉平。頽行軍仁愛。與士卒同甘苦。有病者。親自瞻視。手爲裹創。故皆樂爲死戰。光和二年。爲太尉。會日食。自劾。有司舉奏。詔收印綬。詣廷尉。時司隸校尉陽球奏誅王甫。並及頽。就獄中詰責之。遂飲鴆死。頽字紀明。與皇甫威明。張然明。並知名顯達。京師稱爲涼州三明云。

斷曰

段頽都尉。善於用兵。鮮卑犯塞。卽領兵行。恐賊驚走。詐稱詔停。退還設伏。誘賊墮坑。賊果奔走。斬獲盡情。并涼有寇。頽請先登。郭閔妒忌。稽不得征。坐罪下獄。吏士冤鳴。訟之闕下。始復刺并。煎當與戰。先輸後贏。斬獲功大。封侯以明。東羌反覆。帝問胡寧。頽曰。狼野重誅。莫輕計。冬及夏。當盡削平。或言不可。頽則力爭。盡心苦戰。幸而功成。所以涼州盛稱三明。

皇甫嵩

皇甫嵩字義真。安定朝那人也。少有文武志介。靈帝時。爲北地太守。鉅鹿張角起。皆著黃巾爲標幟。所在燔燒。旬日之間。天下響應。京師震動。因以嵩爲中郎將。與朱雋共發兵討之。雋與賊波才戰敗。嵩因進保長祖。波才遂引大衆圍城。嵩兵少。軍中皆恐。嵩乃謂軍吏曰。兵在奇變。不在衆寡。今賊以草結營。易爲風火。若因夜縱燒擊之。田單之功可成也。是夕大風。嵩乃敕軍士束炬乘城。使銳士間出闔外。縱火大呼。城上舉燎應之。嵩因鼓而奔擊。賊驚亂潰走。會帝遣曹操將兵亦至。合擊。遂大破之。時盧植與董卓討張角。並無功。乃召嵩進兵討之。嵩因與張角弟張梁戰于廣樂。梁衆精勇。嵩乃閉營休士。以觀其變。探賊意稍懈。乃潛夜勒兵。雞鳴馳赴其陣。戰至晡時。大破之。斬梁。獲首三萬級。赴河死者五萬餘人。復乘勝與鉅鹿太守郭典攻張角弟寶於下曲陽。又斬之。又奏請冀州一年田租。以贍饑民。帝從之。百姓歌曰。天下大亂。今市爲墟。母不保子。今夫失其妻。賴得皇甫。今復安居。嵩溫郵士卒。甚得衆情。每行軍頓止。須營幔修立。然後就帳舍。軍士皆食。乃自嘗飯。吏有受賂者。更以錢物賜之。吏懷慙欲自殺。梁州賊王國圍陳倉。復拜嵩爲左將軍。督前將軍董卓。各率二萬人拒之。卓欲速進。嵩不聽。卓曰。速救則城全。不救則城滅。全滅之勢在於此也。嵩曰。不然。百戰百勝。不如不戰而屈人之兵。是以先爲不可勝。以待敵之可勝。不可勝在我。可勝在彼。彼守不足。我攻有餘。有餘者動于九天之上。不足者陷于九地之下。今陳倉雖小。城守固備。非九地之陷也。王國雖強。而攻我之所不救。非九天之勢也。夫勢非九天。攻者受害。陷非九地。守者不拔。今國已陷受害之地。而陳倉保不拔之城。我可不煩兵動衆。而取全勝之功。將何救乎。遂不聽。王國圍陳倉。

自冬迄春八十餘日。城堅守固。卒不能拔。賊衆疲困。果自解去。嵩欲進兵擊之。卓曰不可。兵法窮寇勿追。歸師勿遏。我今追國。是追窮寇。遏歸師也。嵩曰不然。前吾不擊。避其銳也。今而擊之。待其衰也。所擊疲師。非歸師也。國衆且走。莫有鬪志。以整擊亂。非窮寇也。遂獨進擊之。使卓爲後拒。連戰大破之。斬首萬餘級。國走而死。卓大慚恨。由是忌嵩。卓拜爲并州牧。詔使以兵委嵩。卓不從。嵩從子酈說嵩曰。卓被詔委兵。而上書自請。此逆也。又以京師昏亂。躊躇不進。此懷奸也。大人今爲元帥。仗國威以討之。上顯忠義。下除凶害。此桓文之事也。嵩曰。專命雖有罪。專誅亦有責。不如顯奏其事。使朝廷裁之。乃上書以聞。帝謫卓。卓又增怨。及後秉政。乃召嵩爲城門校尉。欲因而殺之。嵩將行。長史梁衍說曰。今召將軍。大則爲禍。小則困辱。今卓在洛陽。天子來西。以將軍之衆。精兵三萬。迎接至尊。奉令討逆。發命海內。召兵羣帥。袁氏逼其東。將軍迫其西。此成擒也。嵩不從。遂就召。有司舉奏嵩。下吏將誅之。嵩子堅壽與卓素善。自長安亡走洛陽。歸投于卓。卓方置酒歡會。堅壽直前。責以大義。叩頭流血。坐者感動。皆離席請之。卓乃起。牽與共坐。使免嵩罪。及卓被誅。復以嵩爲征西將軍。病卒。

斷曰

皇甫將軍初爲郎將。命討波才。寡難衆抗。嵩曰不然。方略爲上。草結賊營。火攻卽喪。束炬乘風。霎時掃蕩。再討張梁。閉營觀望。潛夜勒兵。至晡猶壯。旣斬梁頭。寶頭照樣。請租贍飢。歌安非妄。賊圍陳倉。卓請急向九地九天。嵩先論量。避銳擊疲。其成實當。卓奸專誅。是權伎倆。嵩忠不聽。大禍果釀。流血叩頭。籠

烏始放奸定遭殃。忠終無恙。

朱雋

朱雋字公偉。會稽上虞人也。初歷郡職。交趾賊梁龍反。攻破郡縣。朝廷拜雋爲交趾刺史。令過本郡。簡募家兵。及所合五千人。分兩道而入。旣過州郡。按甲不前。先遣使詣郡。觀賊虛實。宣揚威德。以震動其心。旣而與七郡兵俱進逼之。遂斬梁龍。降者數萬人。以功封都定侯。黃巾賊起。公卿多薦雋有才略。拜爲中郎將。持節與左中郎將皇甫嵩討潁川汝南諸賊。悉平之。南陽黃巾賊趙洪率衆十餘萬據宛城。雋與徐璆秦頡合兵萬八千人圍之。自六月至八月不拔。有司奏欲召雋。司空張溫上疏曰。昔秦用白起。燕任樂毅。皆曠年歷載。乃能克敵。雋討潁川已有功效。引師南指。方略已設。臨軍易將。兵家所忌。宜假日月。責其成功。靈帝乃止。雋因急擊洪。斬之。賊帥韓忠復據宛拒雋。雋兵少不敵。乃張圍結壘。起土山以臨城內。因鳴鼓攻其西南。賊悉衆赴之。雋因自將精兵五千掩其東北。乘城而人。忠乃退保小城。惶懼乞降。張超徐璆秦頡等欲許之。雋曰不然。兵有形同而勢異者。昔秦項之際。民無定主。故賞歸附以勸其來。今海內一統。惟黃巾爲寇。納降無以勸善。討之足以懲惡。今若受之。更開逆意。利則進戰。鈍則乞降。縱敵長寇。非良計也。因急攻之。連戰不克。雋登土山望之曰。吾知之矣。賊今外圍周圍。內營逼急。乞降不受。欲出不得。所以死戰。不如撤圍并兵入城。彼見圍解。勢必自出。自出則意散。易破之道也。乃解圍。賊果出。雋因縱擊大破之。忠降。遂殺之。賊平。封雋錢塘侯。初平中以病卒。

斷曰

郡賊梁龍反於交趾。命雋往征。拜爲刺史。調兵五千。不輕直抵。威德先揚。使其驚靡。七郡齊攻。自斬而死。再討黃巾。趙洪正起。三月攻圍。猶然對壘。有司召還。張溫疏止。雋急進兵。洪方斬矣。韓忠據宛。復爲虎兇。戰敗欲降。衆以爲喜。雋獨不從。細陳底裏。利則橫行。鈍則權已。長寇縱奸。最不可倚。解圍斬之功。方足紀。

三國漢

諸葛亮

諸葛亮字孔明。瑯琊陽都人也。躬耕隴畝。好爲梁父吟。身長八尺。每自比于管仲樂毅。時人莫之許。惟穎川徐庶與亮友善。謂爲信然。時先主屯新野。徐庶因見先主曰。諸葛孔明臥龍也。將軍豈願見之乎。先主曰。君與俱來。庶曰。此人可屈致乎。將軍宜枉駕顧之。由是先主詣亮。凡三往乃見。先主因屏人曰。漢室傾頽。奸臣竊命。主上蒙塵。孤不度德量力。欲申大義於天下。君謂計將安出。亮答曰。曹操比于袁紹。名微而衆寡。然能克紹。以弱爲強者。非惟天時。抑亦人謀。今操擁百萬之衆。挾天子而令諸侯。此誠不可與爭鋒。孫權據有江東。已歷三世。國險而民附。賢能爲之用。此可與爲援。而不可圖也。荊州北據漢沔。利盡南海。東連吳會。西通巴蜀。此用武之國。而其主不能守。此殆天所以資將軍。將軍豈有意乎。至于益州險塞。沃野千里。天府之國也。高祖因之以成帝業。劉璋闇弱。張魯在北。民阜國富。而不知存恤。智能之士。思得明

主將軍既帝室之胄。信義著于四海。若跨有荆益。保其險阻。西和諸戎。南接夷越。外結好孫權。內修政理。天下有變。則命上將將荊州之軍。以向宛洛。將軍身率益州之衆。出于秦川。百姓孰敢不簞食壺漿以迎將軍者乎。誠如是。則霸業可成。漢室可興矣。先主曰。善。因與亮情好日密。關張等不悅。先主曰。孤之有孔明。猶魚之有水。願諸君勿復言。羽飛乃止。先主在新野。孔明募民兵三千。教以陣法。操聞之。恐爲後患。令夏侯惇等引兵攻之。孔明曰。博望新野。皆有山林。因設伏用火攻。及惇至。悉爲火燒敗去。會荊州劉表死。次子琮聞曹操來征。因遣使請降。時先主在樊。遂爲曹操所破。不得已而引軍至夏口。亮曰。事急矣。請奉命求救于孫權。時權擁軍于柴桑。坐觀成敗。亮因說權曰。將軍起兵據有江東。劉豫州亦收衆漢南。與曹操並爭天下。今操芟夷大難。略已平矣。遂破荊州。威震四海。英雄無所用武。故豫州逃遁至此。將軍須量力而處之。若能以吳越之衆與中國抗衡。不如早與之絕。若不能東。何不按兵束甲。北面而歸之。今將軍外託服從之名。而內懷猶豫之計。事急而不斷。禍至無日矣。權曰。苟如君言。劉豫州何不遂事之乎。亮曰。田橫齊之壯士。猶守義不屈。況劉豫州王室之胄。英才蓋世。衆士仰慕。若水之歸海。倘事不濟。此乃天也。安能復爲之下乎。權勃然曰。吾不能舉全吳之地。十萬之衆。受制于人。吾計決矣。非豫州莫可以當操者。然豫州新敗之後。安得抗此難乎。亮曰。豫州軍雖敗於長坂。今戰士多還。關羽水軍萬人。劉琦合江夏戰士。亦不下萬人。曹操之衆。遠來疲敝。聞追豫州。輕騎一日一夜行三百餘里。此所謂強弩之末。勢不能穿於魯縞者也。故兵法忌之。曰。必蹶上將軍。且北方之人。不習水戰。又荊州之民。附操者。逼于兵勢。非心服。

也。今將軍若能命猛將，統兵數萬，與豫州協謀同力，破操軍必矣。操軍破必北還。如此，則荆吳之勢強，而鼎足之形成矣。成敗之機在于今日。權大悅，因命周瑜、程普、魯肅等水軍三萬隨亮詣先主，並力拒曹操。遂敗曹操于赤壁。操引軍還鄴。先主遂收江南，以亮爲軍師，使督零陵、武陵、桂陽、長沙四郡，調其賦稅，以充軍資。後成都平，先主卽帝位，策亮爲丞相。章武三年春，先主於永安病篤，召亮于成都，屬以後事。謂亮曰：「君才十倍曹丕，必能安國，終定大事。若嗣子可輔，輔之；如其不才，君可自取。」亮涕泣曰：「臣敢不竭股肱之力，效忠正之節。」繼之以死。後主建興元年，封亮武鄉侯，開府治事。事無巨細，咸決于亮。南中諸郡並皆叛亂，亮以新遭大喪，故未便加兵。至三年春，亮率衆南征，其秋悉平。乃治戎講武，以俟大舉。五年，遂率諸軍北駐漢中，臨發，連上二表，敘述其出師之由，遂進屯于沔陽。六年春，亮揚聲由斜谷道取郿，使趙雲、鄧芝爲疑軍，據箕谷，而自率諸軍攻祁山。實謂肅號令明，南安天水安定三郡皆叛，魏應亮關中響震。魏明帝西鎮長安，令張郃拒亮。亮使馬稷督諸軍在前，與郃戰于街亭。謾違亮節度，舉動失宜，大爲郃所破。亮拔西縣千餘家還于漢中，戮謾以謝衆。上疏請自貶，冬復出散關，圍陳倉。曹真拒之，亮糧盡而還。魏將王雙率騎追亮，亮還戰斬雙。七年，亮遣陳武攻武都，陰平。魏將郭淮欲擊之，聞亮自出至建威，淮退還。遂平二郡。九年，亮復出祁山，以木牛運糧。旣而糧盡退軍，與魏將張郃交戰，射殺郃。十二年春，亮悉大衆由斜谷出，以流馬運。據武功五丈原，與司馬懿對於渭南。亮每患糧不繼，使已志不申，乃分兵屯田，以爲久駐之基。耕者雜于渭濱居民之間，而百姓安堵，軍無私焉，相持百餘日。其年八月，亮疾病，卒於軍。時年五十。

四及軍退。司馬懿按行其營壘。曰：天下奇才也。諡爲忠武侯。亮性長于巧思。損益連弩。木牛流馬。皆出其意。推演兵法。作八陣圖。咸得其要云。

斷曰

孔明王佐。隆中龍臥。徐庶薦之。茅廬三過。中原曹基。江東孫座。巴蜀將軍。三分負荷。新野兵微。博望將儒。幸有山林。聊以火挫。及樊敗亡。事難安坐。以勢說孫。與劉相和。赤壁火攻。曹兵大破。安輯荆襄。以小成大。卽位成都。方爲帝賀。受托永安。鞠躬匪惰。六出祁山。自爲忠課。木牛運糧。三軍無餓。天命莫逃。秋風作禍。千古悲哀。老臣一個。

關羽

關羽字雲長。河東解人。亡命奔涿郡。先主於鄉里合徒衆。而羽與張飛爲之禦侮。先主襲徐州。使羽行太守事。曹操東征。先主爲所破。奔袁紹。操遂擒羽以歸。拜爲偏將軍。禮之甚厚。然察其心神。無久留之意。因使張遼探之。羽曰：吾極知曹公待我厚。但受劉將軍恩重。誓以共死。不可背也。吾終不留。要當立功以報曹公乃去耳。已而袁紹遣顏良攻魏將劉延于白馬。曹操使張遼與羽爲先鋒。擊之。羽望見良麾蓋。因策馬刺良于萬衆之中。斬其首還。紹諸將莫敢當。遂解白馬之圍。曹操知其必去。重加賞賜。羽盡封還。拜書辭曹公。而奔先主于袁軍。左右欲追之。操曰：彼各爲主。勿追也。羽嘗爲流矢所中。貫其左臂。後瘡雖愈。每至陰雨。骨嘗疼痛。醫云：矢鏃有毒。毒入於骨。當破臂刮骨去毒。此患乃除。羽便伸臂令醫劈之。時羽適請

諸將飲食。臂血流離。盈於盤器。而羽割炙飲酒。言笑自若。先主爲漢中王。拜羽爲前將軍。是歲。羽率衆攻曹仁于樊。曹操使于禁往助之。秋霖雨。漢水泛溢。禁所督七軍皆沒。禁降羽。羽又斬將軍龐德。而陸渾羣盜。或遙受羽印號。爲之黨羽。威震華夏。曹公議徙許都以避其銳。司馬懿以爲關羽得志。孫權必不願也。可使人勸權躡其後。許割江南以封權。則樊圍自解矣。曹公從之。先是。權遣使爲子索羽女。羽辱罵其使。不許婚。權大怒。又南郡太守糜芳在江陵。將軍傅士仁屯公安。素皆嫌羽輕已。羽之出軍。糜傅供給軍資。不悉相及。羽言還當治之。糜傅懷懼不安。及權陰委糜傅。糜傅遂使人迎權。曹公又使徐晃救曹仁。羽不能克。引軍退還。權已據江陵。盡擄羽士衆妻子。羽軍遂散。權遣將逆擊羽。斬于臨沮。

斷曰

關羽純忠。一心漢主。雖被曹擒。斷然不與。斬將報恩。依然高舉。後攻樊城。七軍皆取。華夏震威。曹思徙許。懿請結權。爲羽後蠱。糜傅失供。正愁罪處。合謀迎權。江陵失土。戰退無歸。坑龍阱虎。受害一朝。垂名千古。

張飛

張飛。字翼德。涿郡人也。少與關羽俱事先主。先主奔江南。曹公追之一日一夜。及于當陽之長阪。先主聞曹公卒至。棄妻子。使飛將二十騎拒後。飛據水斷橋。瞋目橫矛曰。身是張翼德也。可來共決死。敵皆無敢近者。故遂得免。先主既定江南。以飛爲宜都太守。旣而入益州。還攻劉璋。飛與諸葛亮等泝流而上。分定